


MARTXEL TOLEDO (ESAIT)

«Alderdi espainolistak beti amestu duten aukera baten aurrean daude»



Alderdi espainolistak beti amestu duten aukera baten aurrean daude: demokraziaren izenean, boterearen bitartez herri hau zapaltzen jarraitzea, nortasun guztia kendu arte. Beste batzuek, berriz, boterea galtzeko arrisku handia dute. Eta abertzale aurrerakoiek duela bi urte martxan jarri zen Lizarra-Garaziko trenari indarra ematea dute jokoan. Jaurlaritza berriaren lehentasuna, herri gisa Euskal Herriak dituen eskubideen defentsa egitea izan behar luke, konplexurik gabe. Gure kasuan, kirolean, euskal lizentziak, federazio nazionalak eta selekzioak bultzatzea litzateke lehentasuna.

RAMON LABAIEN (Donostiako alkate ohia)

«Mayor Oreja da arriskurik handiena Euskal Herriarentzat, eraso jarraitzea dator eta»



Mayor Oreja da arrisku handiena Euskal Herriarentzat. Porrot egin du bere erasoan Polizia baliabideekin, eta orain dator euskal abertzaletasunaren aurkako eraso hori jarraitzea. Jaurlaritza zeharo espainolista sortzen bada... Jaurlaritza berriro abertzalea izaten bada, ordea, lehentasuna izan behar du gure oinarri kulturalak sendotzeak, egunerokoa neurri batean albora utzita. Eta sendotze horren programa bat egin, ETAK dituen anbizio horiei erantzun bat emateko. Erakunde berriak sortu, eta Udalbiltza berri, antolakuntza handiagoarekin eta helburu argi batzuekin.

ANDONI TOLOSA 'MORAU' (Kantaria)

«Berebiziko garrantzia dute hauteskundeek: alde batera edo bestera egin beharra dago»



Jokoan asko dago. Neofrankismoaren itzalean sortu daitekeen gobernu batek sekulako egoneza sortzen du, eta ezin dira neurtu gobernu horrek euskal gizartearentzat izan ditzakeen ondorioak. Bidegurutze garbian kokatzen dira hauteskundeak, eta berebiziko garrantzia dute: alde batera edo bestera egin beharra dago. Jaurlaritza berriak oso betebeharrak argia du: Euskal Herriari naziotasuna aitortuko dion egoerarantz pausoak ematea. Nazioa eraikitzeko pausoak ematea izan behar da Jaurlaritzaren lehentasuna, behingoz eta betiko, bake egoera egonkor batera iritsi ahal izateko.

BOTO SEKRETUA

KIKE AMONARRIZ UMOREGILEA

«Ez daukat gogoan hautagai hauekin inoiz barre egin dudarik»

Imanol Murua Uribe | DONOSTIA

Soziolinguista, txiste kontalaria, telebista aurkezle eta, gaur egun, *Barrebus* telebista saioko zuzendaria da Kike Amonarriz. Begi zorrotzarekin begiratzen die beti alderdi politikoen mezu eta irudiei.

■ Artxiboan gordetzeko moduko ateraldirik entzun al duzu kanpainan?

Arreta berezia jartzen diet era honetan hasten diren esaldiei: «Egia esango dizuet», «Hau agintzen dizuegu».

■ Zergatik?

Ondoren datorren guztia azpimarratu, eta badakizulako alde aurretik ez dela beteko.

■ Arreta jartzen diezu, orduan, kanpainei.

Izugarri gustatzen zait zer irudi eta zer lema erabiltzen diren ikustea, batez ere azken urteotan oso antzekoak erabiltzen dituztela alderdi ezberdinek.

■ Adibidez?

Europako Parlamenturako azken hauteskundeetan hiru alderdik eslogan berbera erabili zuten; leku eta forma desberdinetan, baina berbera. *Zurekin*, zioen EHk, eta EAJk eta PSEk, *Contigo*.

■ Asmatu argudio bat, botoa Mayor Orejari emateko.

Frankismoaren aurka elkartuko garelakoan, datorrela!

■ Beste bat Ibarretxeren-tzat.

Ibarretxe edo Mayor, aukeraketa hor!

■ Orain EHri egin kanpaina. Haurdunaldia eten ez dadin!

■ Barrebusa saiora eramango zenuke hautagairen bat, umeei ondo pasarazteko helburuz?

Zaila izango lukete hori lortzea. Hautagai nagusi hauekin, ez daukat gogoan inoiz eurekin barre egin dudarik. Pailazoz jantzi beharko genituzke, eta gainera pailazo mutuak, badaezpada. Baina izan dira politikoak, propio barre egina-razi digutenak.

■ Zein?

Arzalluzen ateraldi batzuekin egin izan dugu barre, Idigoras batek barre eginarazten zigun, bazituen ateraldi batzuk. Edo Espainian uste dut Alfonso Guerrarekin denok barre egin izan dugula. Baina Euskal Herrian, gehiegi ez dira izan.

■ Miguel Sanz, akaso.

Bai, baina ez nahita. Orain gutxi hitzaldi bat irakurtzen ari zen, «*sine die*» idatzi zioten, eta berak «*sain dei*» irakurri zuen, ingelesa balitz bezala.

■ Botoa nori emango diozun ez dizut galdetu, baina Partido del Karma Demokratikori zergatik ez diozun emango, bai.

Oso oker ez banabil, alderdi erregionalista bizkaitarra delako. Eta ateratzen duten umorezko aldizkaria ez dut



EDURNE KOCH

oso gogoko. *TMEO* bati edo *Naparheid* bati askoz lehenago emango nioke botoa.

■ Zu hautagai izateko, zer sigla asmatuko zenituzke.

Kike Amonarrizen Kandidatura Alferra. Zuek atera siglak.

■ Komikoak ikusi izan ditugu hautagai. Nola zen pailazo frantses hori...

Coluche! Izugarri maite dut, eta bere kanpaina interes handiz aztertu izan dut. Sondeoen arabera, botoen %16 aurreikusi zizkieten, Frantziako hauteskunde presidentziale-tan. Alderdi Komunistak bai-

no aurreikuspen hobeak zitu-ten. Jende ezagunak sosten-gatu zuen: Depardieuk, Moustakik, Cohn-Bendit-ek, Polanskik...

■ Zein ziren bere promesak?

Programak erabat komikoak ziren, baina atzean sistema errotik dantzan jartzeko nahikundea zuen. Afixa batean horrelako zerbait zioen: «Biraoren aurkako kanpaina: ez baduzu berriro esan nahi 'zoazte pikutara', 'denak lapurrak zarete', 'alu koadrila nazkagarria', 'ustelak' eta abar... ez gehiagotan

KANPAINAK

«Azken urteotan lema antzekoak erabiltzen dituzte alderdi ezberdinek»

HIZKUNTZA POLITIKA

«Ezaguna da PPren politika: ez daukanari eman ez, eta daukanari kendu»

esan 'Kaka zaharra!'. Zure botoa, Coluche».

■ Orain hogeitaz urte izan zen, Frantzian. Gaur egun, eta hemen?

Zaila izango litzateke, gauden egoera politikoan. Baina bere garaian izan zen antzeko bat, EMK-k bultzatua, *El hombre de hierro, alcalde para Bilbao* lema-ekin. Kanpaina oso konpartse-roa egin zuten. Hauek guztiak gehiago izaten dira halako haserre bat adierazteko; ez dira izaten benetako alternatibak.

■ Soziolinguista izanda, PPK zonifikazioa nola diseina dezakeen bururatzen zaizu?

PPk aplikatuko duen politika ikusia dugu beste lekutan: ez daukanari eman ez, eta daukanari kendu.

■ Barrebusa saioak iraungo al du programazioan, PP agintean izanda?

La Guagua de la Risa bihurtuko da, agian.

■ Inkestetan jarduna zara. Azken inkestean interpretazioa eta pronostikoa.

PPk eta PSOEk batera, EAJ-EAK eta IUk baino eserleku bat edo bi gehiago. EHk 10-11 eserleku. Gauzak dauden bezala, beraz, eta zoritxarrez, Mayor Oreja lehendakari.